



## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

### ვირსალაძე ელენე ბაგრატიის ასული



ვირსალაძე ელენე ბაგრატიის ასული (29. VI. 1911, თბილისი, - 11. III. 1977, იქვე), მეცნიერი, ფოლკლორისტი. ფილოლ. მეცნ. დოქტორი (1964), პროფესორი (1971), საქართვე. მეცნ. დამს. მოღვაწე (1965). დაამთავრა თსუ-ის ფილოლ. ფაკ-ტი (1930), შემდეგ - ლენინგრადის ლიტერატურის, ენისა და ფილოს. ინ-ტის ასპირანტურა (1935). 1936-იდან მუშაობდა შოთა რუსთაველის სახ. ქართ. ლიტერატურის ინ-ტში.

პარალელურად კითხულობდა ლექციებს თსუ-სა და სხვადასხვა პედ. ინ-ტში. 1976-იდან ხელმძღვანელობდა თსუ-ის ფოლკლორისტიკის კათედრას. იკვლევდა ქართ. ფოლკლორის აქტუალურ საკითხებს: მითოლ. პრობლემებს, ეპიკურ ტრადიციათა თავისებურებებს ზეპირსიტყვიერებაში, ხალხ. ლირიკას, ფოლკლორში თანამედროვე თემატიკის ასახვის ფორმებს, ლიტ.-ფოლკლორულ ურთიერთობებს და სხვ. ვ-ს თვალსაჩინო წვლილი მიუძღვის ეროვნ. ზეპირსიტყვიერების შეკრება-გამოცემაში. აქტიურად მონაწილეობდა ფოლკლორულ ექსპედიციებში. მის მიერ შეკრებილი მასალის დიდი ნაწილი გამოქვეყნებულია გამოკვლევებითა და მეცნ. კომენტარებით. ამ მხრივ აღსანიშნავია ვ-ის „რჩეული ქართული ხალხური ზღაპრები“ (ტ. I, 1949; II-1958), „ქართველ მთიელთა ზეპირსიტყვიერება“ (1958), „ქართული ხალხური თქმულებები და ლეგენდები“ (რუს. ენაზე, 1973) და სხვ. მონაწილეობდა „ქართული ხალხური პოეტური შემოქმედებისა“ (ტ. 1-3, 1960-73) და „ქართული ხალხური პოეზიის“ თორმეტტომეულის (1972-84) შედგენაში, რისთვისაც მიენიჭა საქართვე. სახელმწ. პრემია (1988, სხვებთან ერთად). ვ-ის მონოგრაფია „ქართული სამონადირო ეპოსი“ (1964) ქართ. ფოლკლორისტიკის მნიშვნელოვანი შენაძენია. იგი რუსულადაც დაიბეჭდა მოსკოვში (სერია - აღმოსავლეთის ფოლკლორისა და მითოლოგიის გამოკვლევები; 1976). ვ. იყო

ნარატიული ფოლკლორის საერთაშ. საბ-ბის წევრი (1974). მისი სამეცნ. ნაშრომები  
თარგმნილია რუს., ფრანგ., ინგლ. და გერმ. ენებზე.

**ფ. ზანდუკელი**

---